



REPUBLIKA E SHQIPËRISË  
AUTORITETI I KONKURENCËS  
KOMISIONI KONKURENCËS

Nr. 212/prot.  
7

Tiranë, më 11.05.2023

VENDIM

Nr. 981, Datë 11.05.2023

“MBI AUTORIZIMIN E PËRQENDRIMIT TË REALIZUAR NËPËRMJET KRIJIMIT TË NJË NDËRMARRJE TË PËRBASHKËT ME FUNKSIONE TË PLOTA, NGA SHOQËRITË SAUDI ARAMCO DEVELOPMENT CO LTD. DHE EXCEL INVESTMENTS NETHERLANDS B.V.”

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Adriana BERBERI	Anëtar
Znj.	Rezana KONOMI	Anëtar
Z.	Durim KRAJA	Anëtar

Në mbledhjen e tij të datës 11.05.2023, shqyrtoi çështjen me:

**Objekti:** Autorizimi i përqendrimit të realizuar nëpërmjet krijimit të një ndërmarrje të përbashkët me funksione të plota, nga shoqëritë Saudi Aramco Development Co Ltd. dhe Excel Investments Netherlands B.V.

**Baza Ligjore:** Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

**Komisioni i Konkurrencës**, pas shqyrtimit të relacionit të Sekretarit të Përgjithshëm, si dhe raportit të Drejtorisë së Analizës dhe Metodologjisë së Tregjeve mbi njoftimin e përqendrimit të realizuar nëpërmjet krijimit të një ndërmarrje të përbashkët me funksione të plota, nga shoqëritë Saudi Aramco Development Co Ltd. dhe Excel Investments Netherlands B.V.

VËREN SE :

**I. Palët në transaksion dhe procedura**

Pranë Autoritetit të Konkurrencës është depozituar njoftimi mbi përqendrimin e realizuar nëpërmjet krijimit të një ndërmarrje të përbashkët me funksione të plota, nga shoqëritë Saudi Aramco Development Co Ltd dhe Excel Investments Netherlands B.V.

Referuar “Marrëveshjes së ortakëve” palët janë:

**Pala 1:** Saudi Aramco Development Co Ltd. është një shoqëri me përgjegjësi të kufizuar, me ortak të vetëm, e themeluar dhe që ushtron veprimtarinë e saj në përputhje me legjislacionin e Mbretërisë së Arabisë Saudite, e angazhuar në furnizimin dhe tregtimin e naftës, gazit, petrokimike, shërbimet komunale dhe furnizime industriale.

Saudi Aramco Development Co Ltd. është një filial në pronësi të plotë të shoqërisë Saudi Arabian Oil Company, shoqëri aksionare, e themeluar dhe që ushtron veprimtarinë e saj në përputhje me legjislacionin e Mbretërisë së Arabisë Saudite, e angazhuar në kërkimin, eksplorimin, shpimin dhe nxjerrjen e substancave hidrokarbure dhe përpunimin, prodhimin, rafinimin dhe tregtimin e këtyre substancave.

Saudi Arabian Oil Company nuk ka prezencë ligjore të regjistruar në Shqipëri, por gjeneron të ardhura në Shqipëri përmes tregimit dhe shitjes së hidrokarbureve dhe lëndëve të tjera derivate.

**Pala 2:** Excel Investments Netherlands B.V. është një shoqëri private me përgjegjësi të kufizuar, e themeluar dhe që ushtron veprimtarinë e saj në përputhje me legjislacionin e holandez, me objekt aktiviteti ofrimin e shërbimeve logjistike.

Excel Investments Netherlands B.V. është një filial i zotëruar në mënyrë indirekte nga Deutsche Post AG, shoqëria mëmë e Deutsche Post DHL Group, një grup global logjistik, i cili e ushtron aktivitetin nën dy marka (Deutsche Post dhe DHL).

Deutsche Post DHL Group është prezent në Shqipëri nëpërmjet filialit të tij DHL International (Albania) SHPK, një shoqëri me përgjegjësi të kufizuar, e themeluar sipas legjislacionit shqiptar, e cila ka si objekt të aktivitetit transportin me të gjitha mjetet: transport tokësor, detar, ujor dhe ajror dhe kryerjen e çdo veprimtarie tregtare, industriale, financiare, pasurore, e cila lidhet drejtpërdrejt ose tërthorazi me objektin tregtar të shoqërisë.

**Ndërmarrja e Përbashkët (JV)**, nuk është themeluar ende. Ajo do të themelohet në Mbretërinë e Arabisë Saudite si një shoqëri me përgjegjësi të kufizuar, aktiviteti i të cilës do të jetë:

- a) Të zhvillojë, operojë dhe mirëmbajë objektet për ofrimin e shërbimeve në zonën gjeografike të Arabisë Saudite dhe Rajon;
- b) Të tregtojë, zhvillojë, shesë dhe ofrojë shërbime në zonën gjeografike;
- c) Të kryejë aktivitete kërkimore dhe zhvillimore në lidhje me shërbimet.

Aktualisht nuk ka plane që ndërmarrja e përbashkët (JV) të jetë aktive, apo të ushtrojë aktivitet në Shqipëri.

## **II. Përqendrimi**

Më datë 20 mars 2023 është nënshkruar “Marrëveshje ortakësh” ndërmjet Saudi Aramco Development Co Ltd. dhe Excel Investments Netherlands B.V., në lidhje me krijimin e një sipërmarrje të përbashkët të shërbimeve të zinxhirit të furnizimit në Mbretërinë e Arabisë Saudite.

Saudi Aramco Development Co Ltd. do të ketë një pjesë fillestare të kapitalit të barabartë me 49% dhe Excel Investments Netherlands B.V. do të ketë një pjesë fillestare të kapitalit të barabartë me 51% të kapitalit.

Referuar marrëveshjes, si dhe pasqyrave financiare të palëve, transaksioni i propozuar, përbën një përqendrim në kuptim të nenit 10 dhe 12 të ligjit nr. 9121 datë 28.07.2003 “Për mbrojtjen e konkurrencës” dhe si i tillë është objekt autorizimi nga Komisioni i Konkurrencës.

### III. Analiza e Konkurrencës

Në zbatim të nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës i produktit do të konsiderohet tregu për kontraktimin e shërbimeve logjistike, por duke qenë se transaksioni nuk do të ketë ndikim në tregun shqiptar, tregu përkatës i produktit do të lihet i hapur. Treg përkatës gjeografik do të konsiderohet territori i Republikës së Shqipërisë.

Transaksioni i propozuar është krijimi i një ndërmarrje të përbashkët Joint-Venture me funksione të plota nga shoqëria Saudi Aramco Development Co Ltd. dhe shoqëria Exel Investments Netherlands B.V., e cila do të zotërohet 49% nga shoqëria Saudi Aramco Development Co Ltd. dhe 51% nga shoqëria Exel Investments Netherlands B.V.

Shoqëria J-V do të krijohet në Mbretërinë e Arabisë Saudite dhe nuk ka plane që ajo të jetë aktive në Shqipëri.

Përqendrimi i njoftuar nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë ndryshim dhe nuk do të ketë ndikim në tregun shqiptar.

#### PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”,

#### VENDOSI:

1. Të autorizojë përqendrimin e realizuar nëpërmjet krijimit të një ndërmarrje të përbashkët me funksione të plota, nga shoqëritë Saudi Aramco Development Co Ltd. dhe shoqëria Excel Investments Netherlands B.V.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

#### KOMISIONI I KONKURRENCËS

**Leida MATJA**




Zv/Kryetar

**Rezana KONOMI**




Anëtar

**Adriana BERBERI**



Anëtar

**Durim KRAJA**



Anëtar

**Denar BIBA**


Kryetar